

---

## COMUNICÂT STAMPE

### FINANZIAMENTS TAIÂTS AL FURLAN

#### IL PRESIDENT DE ARLEF ZANON: "INVESTÎ IN POLITICHE LINGUISTICHE SORE IL DUT TE CRISI"

Udin, ai 28 di Zenâr 2013 - Ae politiche no domandîn "contribûts" o fruçons dal bilanç - ancje se dispès la esistence e la vite di cualchi realtât e je metude a dure prove - ma pluitost une politiche linguistiche che e puarti a investî in ducj i setôrs parcè che "la esistence di lenghis e culturis difarentis e je aromai la uniche fonde de specialitât de regjon ma sore il dut parcè che jessi plurilengâi al conven ae economie e duncje a dute la societât, come che a dimostrin tancj esemplis in Europe".

Chest al è l'auspici dai rapresentants des plui impuartantis e inlidrisadis associazions che a lavorin di agnorums a pro dal furlan e che si son dadis adun vuê te sede de Regjon a Udin. La iniziative e je stade inviade di bande des storichis emitents, Radio Onde Furlane e Radio Spazio 103, che te ultime finanziarie regjonâl a àn viodût azerâts i finanziaments pes trasmissions par furlan.

Al incuintri al à volût jessi presint ancje il president de ARLeF- Agenzie regjonâl pe lenghe furlane Lorenzo Zanon, che al à marcât che al è impuartant, propit intun moment di crisi sociâl e economiche, considerâ la politiche linguistiche tant che un setôr strategjic, un investment par dute la comunitât regjonâl.

"La cuistion no je chês di discuti la percentuâl di tai che e je colade su chest o chel altri ent in particolâr - al à fat notâ Zanon - ma di fâ un salt di cualitât te mentalitât: mai come cumò la lenghe e la culture furlane a puedin metisi a disposizion di dute la regjon par valorizâ no dome la nestre identitât ma ancje la nestre economie. No stoi chi a ricuardâ il câs de Catalogne ma o conti che che o ai viodût cui mei voi di resint tal Galles: dongje a Londre, la capitâl globâl par ecelence, un teritori al à savût investî in politiche linguistiche. In Galles no son daûr a discuti se concedi un finanziament a un event culturâl pluitost che a une associazion, ma ogni setôr - sanitât, ents locâi, agriculture e vie indevant - al fâs il sfuarç di insedâ la difusion de lenghe tai siei plans di svilup".

Al è ce che e je daûr a fâ la ARLeF, inviant convenzions in cercins che dome in aparence a àn pôc a ce spartî cu la lenghe e la culture, tant che par esempi il sport e la sanitât, ma che a judin a pandi la lenghe in ducj i setôrs.

"Di autonomist di lunc cors però - al à comentât Zanon - o ai di constatâ che si àn di superâ une vore di ostacui tirâts sù di une cierte politiche cjampaniliste e cjadoche in ducj chescj agns. E sarès ore di finîle di contestâ cualsisedi iniziative pe lenghe furlane cence pensâi sore e al sarè ben scomençâ a considerâ invezit che la vite dal furlan, tant che chê dal sloven e dal todesc, e conven, par esempi, ancje a Triest".

A moderâ l'incuintri al è stât Paolo Cantarutti, president de cooperative Informazion furlane, editore di Radio Onde Furlane, che al à ricuardât dutun cul diretôr di Radio Spazio 103, Roberto Pensa, il stât di estreme dificoltât des emitents.

Al incuintri, indulà che al jere presint il conseîr regjonâl Paolo Menis, a son intervignûts ancje cualchi rapresentant dai ents ricognossûts di primarie impuartance: Federico Vicario pe Societât Filologjiche Furlane e vuê presint tant che delegât dal retôr de Universitât di Udin, Andrea Valcic pe Patrie dal Friûl, Alessandra Kersevan pe societât editore Kappa VU.